

1529 mandaverat, ut enixe Pontificem ad firmandam inter omnes concordiam adhortaretur, quo tandem ex tot ærumnis, & calamitatibus Christiana emerſa Reſpublica in optatum tranquillitatis portum ſe reciperet: id ejus muneris, quo in terris fungitur, eſſe; hoc uno perpetuam ſui nominis famam ad poſteros tranſmiſſurum.

*Classis inſtruetio ad Cæſarem in Italiam advehendum.*

*Senatus ad Gallie Regem ſuaſio, ut exercitum inſtauraret.*

*Venetorum bellici apparatus.*

*Urbinas in imperio Venetiarum copiarum confirmatur.*

Hæc quamvis a Venetis agerentur, plurima tamen adhuc ſuſpicionum ſemina ſerebantur, ex quibus haud facile erat, quo loco tandem res evaſuræ forent, conjicere. Nam Cæſar ſe in Italiam venturum vulgaverat, atque ad illud iter conſiciendum claſſem ſummo ſtudio inſtrui juſſerat. Ferdinandus frater Oeniponte magnum militum delectum habebat, conventibusque per Germaniam vocatis, ſubſidia impetraverat; quæ licet, ut Turcarum Imperatori, qui Pannoniis imminebat, obſiſteret, cogi rumor erat; tamen ea conditione illa obtinuiſſe ferebatur, ut etiam, ſi opus foret, in Italiam mitteret. Quocirca Senatus ſæpius Franciſci Gallorum Regis animum ad inſtaurandum exercitum inflammare, ſuas copias augere, novos præfectos, ac duces deligere, claſſem in promptu habere; tum, ut ſi hoſtis in Italiam Cæſar accederet, illius adventus prohiberi poſſet; tum, ut tranſacta hyeme Mediolanum communi conſilio oppugnaretur. Interim cum in dies rumor de Cæſaris in Italiam adventu magis augetur, Ferdinandumque in Venetorum fines moturum haud vulgaris opinio eſſet, quæcumque ad Reipublicæ fines tuendos, atque ad oppugnandos hoſtes neceſſaria erant, ſedulo parabantur. Cæſar Fulgoſius levioris armaturæ equitatus præfectus a Senatu deligitur, ſtipendio ad mille ducentorum aureorum numerum adaucto. Annibal Fulgoſius, qui nuper, cum ab Hiſpanis Ticini captus fuiſſet, ſeſe ex ſervitute redemerat, atque omnem ſuſpicionis notam a ſe coram Senatu repulerat, pedestris præfecturæ honore inſignitus, atque ut quingentos Corſicæ gentis Reipublicæ ſtipendiis militaribus adjiceret, injunctum. Farfarellus item Ravennas, Aventinus Friapanes Veronenſis leviorum equitum præfecti declarati; illi, ut centum quinquaginta; huic ut centum equites compararet, mandatum. Ad hæc, cum jam tempus, quo Urbini Dux Reipublicæ ſtipendia merebat, conſectum eſſet, denuo Imperator terreſtrium copia-